

La doturia Grete Mählknecht é demez dai 17 (lönesc) ai 26 (dedemesaledema) d'aurí. Ara vëgn sostituida dala doturia Febbraro, Al Plan, 377 32 88 595.

PLOANIES SAN MARTIN Y LUNGIARÜ

Sëra d'informaziun cun Markus Felderer, sura la preparaziun ala Crejima, che mët man en chësc altonn. Jones y jogn che complësc 16 agn cina al de dla confermaziun – preodü por Pasca de ma 2025 – é bel invia cun geniturs, totes y toc y interessá da gní: ai 28 d'aurí dales 20.00 a Badia, Ciasa Runcher, o ai 12 de ma dales 20.00, a Al Plan, salf Raiffeisen.

Les Uniuns dles Ères da San Martin y Lungiarü vënn incö, Pasca, do la Gran Mëssa rôses sot al tema "na rôsa por la vita - daidé por daidé" por l'assoziazion Südtiroler Krebshilfe. Bel dilan de osta spënorá.

Indoman, Lönesc de Pasca, é duc invia a San Martin, ala Gran Mëssa dales 9.30, cun presentaziun dl liber "Cianties sacrales por cors". Al ciantará i Cors de dljia da La Ila y da San Martin y le Cor Raiëta. Dedô salüt ofizial tl salf dl Istitut Ladin y pice renfrësch. Matinée culturala dales 11.30: Aurela cörta cun Laura Willeit & Hubert Dorigatti, liagnes blances, üs da cufé, marcé de libri.

Perié y cianté cun le liber nü "Laldun le Signur" en dedemesaledema, ai 12 d'aurí, dales 19.30, cun siur Ulrich Fistill y Franz Comploi, tla dljia d'Al Plan.

Sciöche dan la pandemia vëgnel indô tigní n'ora de oraziun al mëis tla stüa dla ciasa de nosc Sant a Oies, vigni secundo vëndres dl mëis dales 20.00. La proscima ora é en vëndres, ai 14/04, dales 20.00; datrai cun cianties da Taizé.

La Uniun Pastoral Val Badia ves invieia a vijité Assisi cun Christian Ferdigg dai 28 ai 31 d'otóber 2023; lade cun le bus dala Val Badia cina a Assisi y indo a ciasa; 3 nôts te Hotel cun gosté y cëna. Christian y sù amisc franzescans ves mostrará Assisi y ves condejará ite tla spiritualité franzescana. Le prisc por porsona é de 285 € cun mesa ponsiun (ciamena singula 335 €). Iscriziuns cina ai 30 de ma pro Holimites 0471 838 022 o e-mail: iadi@holimites.com

Por sëgn de dilan ai sorvidus por so bel sorvisc orunse ti mëte val' te cëst che le lou da Pasca ais val' da ti dé.

SAN MARTIN

I sun duc invia l'atra domënia, ai 16 d'aurí, ala prozesciun de San Germano.

Le grup jonil di stödafuch da San Martin à indô metü man súa ativité. Duc i mituns da 12 agn insö o che i complësc en chësc ann y ess interess da to pert pó se anunzié pro Dennis sot al numer 346 95 70 357.

LUNGIARÜ

Le KVV Lungiarü organisëia ai 18 d'aurí dales 19.30 na sëra da cujine por ëi cun Hermann Dapoz, prenotaziuns cina ai 9 d'aurí 34712 93 529.

L'Uniun dl Sport San Martin mët a jì n curs de Pilates - *ciarede tl' ultima plata*.

L'Uniun dl Sport S. Martin mët a jì n curs "Movimënt y creativité" por mitans dla scora elementara - *ciarede tl'ultima plata*.



unitepastorala.org

Plata dles Ploanies San Martin y Lungiarü

ploan siur Klaus Sottas 344 15 54 055 - klsottas@rolmail.net
curat siur Heinrich Perathoner 339 65 74 213
redaziun: anton.gasser@rolmail.net - 348 27 44 517 / 0474 523 194


09.04. - 16.04.23 n. 20

ultimo termo por comunicaziuns: jöbia, dales 20.00

DOMËNIA DE PASCA

Vangele do Jan 20, 1-18

Le pröm dé dl'edema, é Maria da Màgdala jüda da doman adora, canch' al é ciamò scür, fora dala fossa y à odü che la pera é tuta demez dal sepolcher. Ara é saltada debota da Scimun Pire y dal discepul, a chël che Gejü ti orô bun, y ti à dit: An à tut le Signur fora de sepolcher, y i ne savun nia, olach'an l'è metü. Dailò é Pire y l'ater discepul jüs ia y fora y é rovà fora dal sepolcher; ai é saltà trami deboriada, mo deache l'ater discepul é plü asvelt co Pire, é chël rové por pröm dal sepolcher. Al s'è cufé jö y ite y à odü les fascas de lin ia por tera, mo al n'é nia jü ite. Tratan é incé rové adalerch Scimun Pire, che ti gnô do, y é jü ite tl sepolcher. Al à odü les fascas de lin ia por tera ... Spo é incé jü ite l'ater discepul, che é rové por pröm dan le sepolcher; al à odü y à cherdü.



La noela de Pasca, cuntada dal vangelist, Jan é drammatica, na saltada fora dala fossa, n ia y ca, odëi y impó ne capí nia. Dübi y presentimënc. Ai discepui ti éra jüda insciö y magari ince a tröc de nos.

I chirun segurëza de fede y ne la ciafun nia.

La resposta dla doman de Pasca pëia ia dal cör de Maria Magdalena.

Ara pita y plüra, deache cun la mort de Gejü ára pordü döt:

stima y amur, daciassa y proteziun.

Canche Gejü dij so inom, sintera y sára ch'al vir.

Süa tristëza ciafa consolaziun y ara pó ti dí ai discepui: "I á odü le Signur."

Chësta éra ferida y grandiosa, testemona dla ressureziun, pó nes mostré a nos y ala Dljia le tru.

Te Deum

